

Dolarisacion

Corsou ainda no a dicidi si ta si of no!

WILLEMSTAD - Gobierno di Corsou no a tuma un decision ainda si ta dolarisa of no. “Loke tin riba papel awor aki ta, cu pa 2012 nos moneda lo mester bira e Caribbean Guilder y cu nos tin un banco central comparti cu St. Maarten.

Por lo demas no tin ningun palabracion ni decision”, Minister di Finansa Jorge Jamaloodin a declara awe mainta, na apertura di e reunion publico di Parlamento di Corsou. Tabata un reunion pidi pa lider di fraccion di Pueblo Soberano Helmin Wiels. Wiels a haci e peticion pa e reunion despues cu a sali na cla, cu Emsley Tromp lo a declara na St. Maarten – durante un presentacion riba e tema aki – cu e ta na fabor pa dolarisa tanto na St. Maarten como Corsou y cu alabes el a compronde di e Minister di Finansa di Aruba, ku Aruba ta simpatisa fuertemente cu e idea aki. E actual Minister di Finansa di Aruba sinembargo a rechasa, cu el a haci ningun declaracion den e sentido aki na Tromp y el a exige pa Minister di Finansa di Corsou pone esaki preto riba blanco den un carta. Mester bisa, cu e asunto aki a causa un conmocion completo. E tema dolarisacion a lanta cabes ultimo tempo, despues cu Emsley Tromp, Presidente di Banco Central di Corsou y St. Maarten a bolbe expresa su mes na fabor di dolarisacion. No ta un secreto cu semper Tromp tabata na fabor pa introduci dollar, awor cu Antia a stop di existi y cada isla mester tuma un decision ki moneda e ta bay sigui uza como moneda oficial. E reunion a cuminsa awe mainta cu un confusion riba e punto, si Emsley Tromp – cu tabata presente den sala - mester tene un presentacion riba dolarisacion of no. Partidonan di oposicion a argumenta, cu nan a compronde for di e invitacion, pa e reunion cu esey lo ta e caso. Ta bin

acerca, cu ora miembronan di Parlamento a yega sala di Parlamento, e ekipo pa haci e presentacion (Powerpoint) tabata instala caba. Pero Helmin Wiels a refuta

categoricamente cu esey tabata parti di e peticion pa reunion cu el a pidi. El a bisa cu loke e kier a papia riba dje ta e discusion cu a surgi riba e tema aki entre Corsou y

Aruba. Finalmente, den un presentacion cortico Minister Jamaloodin a bisa cu Gobierno di Corsou ainda mester profundisa riba e

tema. Ta combersando cu “stakeholders” riba e asunto y ta ora termina esey, lo dicidi kico ta haci. No tin niun decision ainda al respecto, el a sigura.